

दिनांक 22.12.2024

समय: 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेन्द्र मोदी काले रोजगार मेळा मांय 71 हजार ऊं बत्ती नौजवानां ने नियुक्ति पत्र संपेलां—प्रदेश मांय अजमेर अर जोधपुर मांय अ मेळा आयोजित व्हेला ।
- लोकसभा अध्यक्ष ओम बिरला कह्यो—रामगढ़ अभ्यारण्य मांय बाघां रे साथै चीतां ने ई बसावण सारु कोशिश करी जावे ।
- चिकित्सा मंत्री गजेन्द्र सिंह खींवर चिकित्सा सेवावां री मजबूती सारु सरकार री प्रतिबद्धता ने दोहराया—कह्यो—संसाधना मांय कोई कमी नी राखी जायेला ।
- राज्य मांय दो आथूणी विक्षोभां रा असर ऊं आवता दिनां केई ठौड़ां मावठ रा आसार ।

000

प्रधानमंत्री नरेन्द्र मोदी काले रोजगार मेळा मांय वीडियो कॉन्फ्रेंस री मार्फत 71 हजार ऊं बत्ती नौजवानां ने नियुक्ति पत्र देवेला । ई मौके प्रधानमंत्री लोगां ने संबोधित ई करेला । अ मेळा मेला देशभर मांय 45 ठौड़ां आयोजित कर्या जायेला । अठिने प्रदेश मांय अजमेर अर जोधपुर मांय रोजगार मेळा लगाया जायेला । जोधपुर मांय बी.एस.एफ. सीमांत मुख्यालय मांय आयोजित मेळा मांय केन्द्रीय मंत्री गजेन्द्र सिंह शेखावत 200 चुणी ज्यां उम्मीदवारां ने नियुक्ति पत्र सौंपेला । आ मांय बी.एस. एफ., सीआर.पी.एफ., आई.टी.बी.पी., एस.एस.बी., सी.आई.एस.एफ. असम राइफल्स, रेलवे, डाक महकमां समेत न्यारा—न्यारा सरकारी संस्थावां मांय नौकरियां रा नियुक्ति पत्र भेळा है ।

000

लोकसभा अध्यक्ष ओम बिरला आज कोटा मांय विजय रन ने हरी झंडी दिखा र रवाना कर्या । ई मौके वणा कह्यो के ओ कार्यक्रम नी फगत स्वास्थ्य रे प्रति जाग जगावण रो असरदार जरियो है बल्कि वीर

सैनिकां ने श्रद्धांजलि अर्पण करण अर वां री गौरव गाथां ने साझां करण री अनूठी कोशिश की है। श्री बिरला आज ई कोटा मांय जनसुनवाई ई करी। वणा अहलकारां ने ई दौरान मिली समस्यावां ने तुरत निपटावण रा निर्देश दिया। श्री बिरला अलकारां ऊं कह्यो के गांवाई हलकां रा रहवासियां री समस्यावां रो निपटारों वठा रा थर माथे करण सारू वीडियो कॉन्फ्रेन्सिंग री मार्फत बरोबर जनसुणवाई करी जावे। जिण ऊं लोगां ने जिला मुख्यालय आवण री जरूरी नी पडेला। श्री बिरला ई दौरान खबरनवीसां ऊं ई बतळ करी। वणा बतायो के रामगढ़ अभ्यारण्य मांय बाघां रे साथै ई चीताई बसावण सारू सरकारी थर माथे कोशिश करी जाय री है।

000

सवाईमाधोपुर रा रणथंभौर दुर्ग मांय लारला तीन दिन ऊं बाघिन अर शावकां री हलचल होवण रे कारण आज दुर्ग अर त्रिनेत्र गणेश मंदिर जावण वाळा लोगां रे आवण माथे रोक लगा दीरीजी। जंगळात महकमां कानी ऊं दुर्गा हलकां मांय जंगळात कर्मियां ने ट्रेकिंग सारू लगायी ज्या है। ध्यानजोग है के बाघिन टी-84 एरोहेड़ अर उण रा शावक 20 दिसम्बर री सिंज्यां पैली बार दुर्ग हलकां मांय देखी ज्या हा।

म्हारा खबरनवीस बतायो के आं री हलचल पद्मला तालाब, लक्ष्मी नारायण मंदिर अर 32 खंभां री छतरी रे आरे-सारे देखी ज्यी है।

000

चित्तौड़गढ़ मांय मीराबाई री जयंती रे मौके मीरा महोत्सव रो आयोजन कर्यो जावे। काले देर रात सारू व्ह्या तीन दिन रा महोत्सव रे तहत केई रंगारंग कार्यक्रम व्ह्या रह्या है। म्हारा खबरनवीस बतायो के आज न्यारा-न्यारा हलकां रा लोक कलाकार आप री प्रस्तुतियां देवेला।

ध्यानजोग है के केंद्रीय संस्कृति अर पर्यटन मंत्री गजेंद्र सिंह शेखावत काले मीरा महोत्सव री सुरूआत करी ही। चित्तौड़गढ़ किला रा फतेह प्रकाश महल मांय व्ह्या उद्घाटन जळसा मांय केंद्रीय मंत्री मीरा बाई रा त्याग अर बलिदान ने याद दिराया। ई मौके वणा मीरा बाई माथे छापी ज्यी एक पोथी रो विमोचन ई कर्यो। ई दौरान जन नुमाइन्दा अर अहलकारा रे साथै दूजा लोग ई मौजूद रह्या। उठिने पाली मांय चाल रह्या रणकपुर महोत्सव रो आज समापन व्हे रह्यो है। आज दूजे

अर आखिरी दिन जीप सफारी, मूँछ होड़, घोड़ा दौड़, रस्साकसी, मिस्टर अर मिसेज गोड़वाड़ समेत केई होड़ा व्ही।

000

चिकित्सा मंत्री गजेन्द्र सिंह खींवसर कह्यो है के प्रदेश मांय चिकित्सा सेवावां री मजबूती सारू संसाधना मांय कोई कमी नी राख्यी जायेला। वणा कह्यो चिकित्सा सेवावां मांय सुधार ने ले र राज्य सरकार बरोबर कोशिश करे। श्री खींवसर आज जैसलमेर जात्रा रे दौरान खबरनवीसां सामी कह्यो के महकमां मांय अजै तांई कोई 18 हजार भर्तियां व्हे चुकी है अर बेगा ई चिकित्सका अर नर्सिंग स्टॉफ री भर्ती करी जायेला। जैसलमेर, बाड़मेर, जालौर, बांसवाड़ा अर डूंगरपुर जिलां ने खास दर्जो दे र चिकित्सा सेवावां सुलभ करायी जायेला।

चिकित्सा मंत्री जैसलमेर रा जवाहिर अस्पताल रो निरीक्षण कर ने बन्दोवस्तां रो जायजो लियो। वणा मुख्य चिकित्सा अर स्वास्थ्य अहलकार दफ्तर मांय समीक्षा बैठक ई करी। वणा कह्यो के जैसलमेर जिला मांय ए.एन.एम. रा खाली ओहदा ने बेगा ई भर्या जायेला। श्री खींवसर कह्यो के सामुदायिक स्वास्थ्य केन्द्रां माथे स्वास्थ्य अहलकारां रा रीता ओहदा ई बेगा ई भर दिया जायेला।

000

केंद्रीय वित्तमंत्री निर्मला सीतारमण तीन दिन रा जैसलमेर प्रवास रे पछे आज दिल्ली सारू रवाना व्हे ग्यी। आज तीजे दिन वणा जैसलमेर रा सोनार किला ने देख्या। वणा दुर्ग री सुंदरता अर कलात्मकता री तारीफ करी। श्रीमती सीतारमण पैदल चालता लोगां अर सैलाणियां ऊं बतळ करी। ई दौरान चिकित्सा मंत्री गजेन्द्रसिंह खींवसर अर विधायक छोटूसिंह भाटी ई मौजूद रीया। इण ऊं पैला, श्रीमती सीतारमण शक्तिपीठ तनोट माता रा दर्शन कर ने देश मांय खुशहाली री कामना करी। वणा तनोट परिसर मांय लगाई ज्यी ऑडियो विजुअल अर हथियार नुमाईश ने ई देख्या। केन्द्रीय वित्त मंत्री विजय स्तम्भ माथे पुष्प अर्पण कर ने शहीदां ने श्रद्धांजलि दी। ध्यानजोग है के श्रीमती सीतारमण जैसलमेर मांय राज्यां रा वित्तमंत्रियां रे साथे शुक्रवार ने प्री-बजट मीटिंग करी ही। बठै ई शनिवार ने जीएसटी काउन्सिल री बैठक री सदारत करी।

000

प्रदेश मांय आवता दिनां एक रे पछे एक दो आथूणी विक्षोभ रे सक्रिय होवण री आस है। इण रा असर ऊं केई ठौड़ां मावट रा आसार है। मौसम केन्द्र जयपुर रा निदेशक राधेश्याम शर्मा बतायो के एक आथूणी विक्षोभ आवता 24 घंटा मांय ई सक्रिय व्हेला। वठे ई दूजो सिस्टम 26–27 दिसम्बर ने असर मांय रहवण री आस है। वणा बतायो के इण रे पछे कमती रा तापमान मांय कमी आवण री ई आस है।

ई बीचे, राज्य मांय लारला 24 घंटा मांय सब ऊं कम साढे 4 डिग्री सेल्सियस कमती रो तापमान करौली मांय दर्ज करी ज्यो। संगरिया मांय 5 दशमलव 3 डिग्री, फतेहपुर मांय 5 दशमलव 4, चूरू अर अलवर मांय 6–6, श्रीगंगानगर मांय 7, धौलपुर मांय 7 दशमलव 5, अंता मांय 7 दशमलव 8 अर राजधानी जयपुर मांय 12 दशमलव 4 डिग्री कमती रो तापमान दर्ज करी ज्यो।

000

इस साल ने विदा करण मांय अवै कुछ ई दिन बाकी रीया है। ऐड़ा मांय सर्दी री छुट्टियां बितावण, क्रिसमस तिवांर मनावण अर नुवां साल रो स्वागत करण सारू आं दिनां प्रदेश री सैलाणी ठौड़ां सैलाणियां ऊं गुलजार है। उदयपुर मांय देशी अर विदेशी सैलाणियां री खासी चलह पहल देखी जावे। अठे लगे टगे सगळा होटल अर रिसोर्ट बुक चाल रह्या है। म्हारा खबरनवीस बतायो के सैलाणियां री हिफाजत सारू प्रशासन पुख्ता बन्दोवस्त कर्या है।

000

बाड़मेर ज़िला मांय आवता 26 दिसम्बर ऊं दृष्टि बाधित खिलाड़ियां सारू राज्य थर री खेल–कूद होड़ रो आयोजन व्हेला। निम्बला ग्राम पंचायत रा सरकारी उच्च माध्यमिक विद्यालय मांय होवण वाळी ई होड़ मांय राज्य रा न्यारा–न्यारा ज़िला रा 320 खिलाड़ी हिस्सो लेवेला। और ब्यौरा म्हारा खबरनवीस ऊं –

000